

《佛說造塔功德經》

如是我聞，一時佛在忉利天宮白玉座上，與大比丘大菩薩等，及彼天主無量眾俱。時大梵天王那羅延天自在天及五乾闥婆王等，各與眷屬俱來至佛所，欲問如來造塔之法，及塔所生功德之量。會中有菩薩名觀世音，知其意即從座起，偏袒右肩右膝著地，合掌向佛而作是言：世尊，今此諸天乾闥婆等故來至此，欲請如來造塔之法，及塔所生功德之量，唯願世尊為彼解說，利益一切無量眾生。

爾時世尊告觀世音菩薩言：善男子，若此現在諸天眾等，及未來世一切眾生，隨所在方未有塔處，能于其中建立之者，其狀高妙出過三界，乃至至小如庵羅果，所有表刹上至梵天，乃至至小猶如針等，所有輪蓋覆彼大千，乃至至小猶如棗葉，於彼塔內藏掩如來，所有舍利發牙髭爪下至一分，或置如來所有法藏十二部經，下至於一四句偈，其人功德如彼梵天，命終之後生於梵世，于彼壽盡生五淨居，與彼諸天等無有異。善男子，如我所說如是之事，是彼塔量功德因緣，汝諸天等應當修學。

爾時觀世音菩薩復白佛言：世尊，如向所說，安置舍利及以法藏，我已受持，不審如來四句之義，唯願為我分別演說，爾時世尊說是偈言：

諸法因緣生 我說是因緣
因緣盡故滅 我作如是說

善男子，如是偈義名佛法身，汝當書寫置彼塔內。何以故？一切因緣及所生法性空寂故，是故我說名為法身，若有眾生解了如是因緣之義，當知是人即為見佛。

爾時觀世音菩薩，及彼諸天一切大眾乾闥婆等聞佛所說，皆大歡喜信受奉行。